

Ina reverenza per l'Uniun da teater Cuschnaus

Turnea da teater tras ils vitgs lumnezians, a Glion e si Platetg

■ L'Uniun da teater Cuschnaus festivescha uonn siu giubileum da 30 onns. L'entschatta settember viseta per quei motiv ina grupp da siat acturas ed acturs sut la reschia da Marina Blumenthal tut ils vischinadis dalla vischnaunca Lumnezia. Sin ina tribuna che vegn mingamai erigida ad hoc amiez vitg dattan els la cumedia «La reverenza» ch'igl autur Erwin Caduff ha scret spacialmein pigl anniversari rodund dall'uniun.

Dallas entschattas a Cuschnaus tier in'uniun da vallada

Egl onn da giubileum dat l'Uniun da teater Cuschnaus in sguard sin sia historia. Suenter che l'activitad da teater ellas vischnauncas da Cumbel e Morissen era tschessada els onns 70 ed 80 ha ina grupp entuorn Reto Collenberg, Egmont Heisch, Rita Montalta, Maria Riedi e Margreta Riedi priu l'iniziativa da puspei resvegliar il teater popular en Lumnezia. Aschia ei l'Uniun da teater Cuschnaus naschida culla radunonza da fundaziun dils 8 da fenadur 1988 a Cuschnaus. Suenter las presentaziuns da differents tocs humoristics all'entschatta dils onns 90 (aschia p. ex. «Ina stiva plein giuvnas», 1989, «Rueida on zuler», 1990 ni «Il Paul sin peis» 1991) han ils dramas «Il diari dall'Anne Frank», 1996 e «Johnny Belinda», 1998 cul regissur Erwin Caduff dau in schatg dil vast potenzial dalla grupp. In dils puncts culminants ei allura stau il project «La Passiun» igl onn 2003 sut la reschia da Nicolaus Caduff ed Erwin Caduff cun totalmein varga 400 persunas involvidas.

Anno 2007 ha l'uniun dislocou il liug da presentaziun da Cuschnaus a Degen. Cul regissur professional Roman Weis-



Ils acturs da «La reverenza»: Michela Projer, Iris Derungs, Ursin Derungs, Rafaela Caduff, Angela Collenberg, Sabrin Derungs, Sara Riedi (da sen.).

haupt al tgamun ei denter auter vegniu presentau cun grond succes ils teaters «Il process da paternitad dil lennari Giuseppe», 2010 ed «Il cor schelau», 2012. Siu assistent Linus Riedi ha suenter surpriu la reschia dils tocs «Bubacultura – davart mals dil mintgadi», 2014 e «La lingia blaua», 2016. Per la presentaziun dalla cumedia «Rir da schluppar» ei uonn cun Marina Blumenthal per l'emprema gada ina dunna stada responsabla per la reschia. Ella meina era la reschia dil toc actual «La reverenza». L'uniun dumbra oz

varga 70 commembers. Il num «Cuschnaus» ei restaus. El representa las ragischs dall'uniun. Ils commembers ein denton domiciliai ell'entira Val Lumnezia ed era sur ils culfins dalla Val ora.

Acturas ed acturs giuvens

Dapi l'entschatta d'ost meina la regissura Marina Blumenthal atras pliras emprovas ad jamna per studegiar en il toc culla grupp. Acturas ed acturs han cheutras la caschun da collaborar cun ina persuna dil fatg e da profitar dad inputs pro-

fessiunals. La grupp secumpona dad Ursin Derungs, Angela Collenberg, Rafaela Caduff, Michela Projer, Sara Riedi, Iris Derungs e Sabrin Derungs. Alla regissura eis ei pia reussiu da recaltgar in grond diember d'acturas ed acturs giuvens per il project da teater. Ensemen culs acturs versai resultescha aschia in bien mix e l'uniun sa mirar anavon cun optimissem sil proxims 30 onns.

Per festivar il giubileum da 30 onns dall'Uniun da teater Cuschnaus ha Erwin Caduff scret ina cumedia cul tetel

«La reverenza». La cumedia vegn menada si mingamai els vischinadis dalla vischnaunca Lumnezia sco era el Cinema Sil Plaz a Glion. La derniera ha liug en collaboraziun cullas pendicularas Sursai/Mundaun si Platetg, il cuolm-casa dil territori da skis lumnezian. Avon la produziun eregian ils acturs mingamai ina tribuna ad hoc. Nomen est omen: aschia tracta la cumedia numadamein damondas davart la reverenza che vegn per ordinari fatga suenter ina produziun da teater. Denton ei era gia il project sco tal ina reverenza – ina reverenza per l'Uniun da teater Cuschnaus che festivescha uonn siu giubileum da 30 onns.

Martin Heisch

Datas dalla turnea

- 01-09-18, allas 20.00, Morissen (avon Mulin)
- 02-09-18, allas 17.00, Cumbel (plaz da giugs)
- 02-09-18, allas 20.00, Vella (davos scola)
- 03-09-18, allas 20.00, Degen (avon baselgia)
- 04-09-18, allas 20.00, Vignogn (avon baselgia)
- 05-09-18, allas 20.00, Lumbrein (avon scola)
- 06-09-18, allas 20.00, Vrin (avon scola)
- 07-09-18, allas 20.00, Camuns (avon scola)
- 08-09-18, allas 20.00, Glion (Cinema Sil Plaz)
- 09-09-18, allas 14.00, Platetg (sutgera Triel 13.30)

Flem sin viseta en Lumnezia

Cuminonza Romontscha Flem

■ (cp) Sonda vargada ha la Cuminonza Romontscha Flem (CRF) fatg ina ulteriura viseta alla vischnaunca Lumnezia. Quella gada ha ella visitau la baselgia parochiala Pleif a Vella e l'ustria Mulin a Morissen ch'ei vegnida aviarta igl onn 2017. A caschun dalla radunonza annuala 2018 haveva la CRF susteniu claramein quella proposta dalla suprazonza. Il president Hanspeter Meiler ha beneventau cun veseivel plascher ils 15 commembers ch'han dau suatientscha all'invitaziun ed han nezegiau il bi suentermezdi per ina viseta en quels loghens historics dalla Val Lumnezia.

Spassegiada enviers la baselgia parochiala a Pleif

La pintga spassegiada naven dalla casa da scola a Vella enviers la baselgia parochiala

la Pleif ei stada ina caschun beinvegnida per ina scumiada da plaids personala denter ils visitaders. Entgins han nezegiau la schanza da far en quei liug idillic – oravontut dalla baselgia – empremas fotografias. Arrivai sigl areal dalla baselgia parochiala han tuts tschercau – quei di da calira – l'umbriva denter las plontas e caglias dil liug.

All'entschatta dalla guidada ha Giosch Gartmann orientau la grupp sur dalla posiziun ed il contuorn dalla baselgia. Sur las valladas vischinontas ora ha el fatg attents sin ils cuolms e la pezza dalla regiun e lu era sin il Crest dils Tgauns ed il Crest dalla Fuortga. Lu ha el explicau cuortamein las midadas da possess e la muntada centrala dalla baselgia parochiala e dil santeri per la vallada el decuors dalla historia. La baselgia ei dedi-

cada a sogn Vintschegn. Aschia schai ei damaneivel d'udir era sur dad el enzatgei. Quei pensum ha Ruth Gartmann surpriu. Ella ha raquintau la detga dil patruon-baselgia ed era menziunau che sogn Vintschegn vala sco patruon da Portugal.

Dad 800 tochen oz

Tenor las explicaziuns da Giosch Gartmann ei la baselgia parochiala dad oz seviluppada sur differents etappas da baghegiar e restauraziuns dalla baselgia da treis apsidas dil temps carolingic agl edific sacral dad oz. In punct decisiv per la fuorma dad oz ei la restauraziun entuorn 1500 stada. Da gliez temps ha il chor – en connex cull'engrondidada dalla baselgia – midau direziun dad ost viers vest. Da gronda muntada ei era la fundaziun dalla Confraternitad dil sogn Rusari dil

onn 1613 stada. La confraternitad ha dau a Gion Battista Macolino ord la Val San Giacomo l'incumbensa da malegiar la battaglia da Lepanto, il maletg che penda vid la preit el nord dalla baselgia. Ruth Gartmann ha explicau quei maletg e pli tard era las tablas commemorativas dalla baselgia s. Vintschegn davart las battagliais alla Tgalavaina, sper Porclas e sper la punt da Rehanau. Giosch Gartmann da sia vart ei entaus en sias explicaziuns sin ils altars ed ils sogns ch'ei representai leu sco era sin auters maletgs che penda vid la preit e valan en la baselgia catolica sco cuntengs da cardientscha.

Mulin da Morissen

Suenter l'interessanta viseta ella baselgia parochiala da Pleif ei la grupp serendida en l'ustria Mulin da Morissen. Hanspeter

Schneider ch'ei responsabels el Mulin per las lavurs da muliner ha demonstau ed orientau ils visitaders sur dil process dil moler. Ozildi mola el oravontut spelta originala e ferment da bio. El ei entusiasmaus ch'igl ei pusseivel da producir frina en quei vegl mulin ed era da vender quella. El sez seigi vegnius tier quella lavur damai che sia feglia Anita Micchelucci hagi surpriu da menar il mulin ed hagi engaschau el perquei ch'el seigi pli baul staus muliner. Oz stat Schneider sper il moler era a disposiziun per mussar il mulin e per cuors da moler e far paun cun classas da scola. Suentar la viseta el mulin han las visitadras ed ils visitaders da Flem gaudiu en l'ustria in stupent pushegn en simpatica atmosfera. Lu ein els turnai – cuntents cun igl emperneivel decuors dalla viseta – anavos a Flem.



Baselgia parochiala Pleif a Vella.



Grupp dalla Cuminonza Romontscha Flem avon la baselgia s. Vintschegn.



Hanspeter Schneider explichescha il process da moler el Mulin da Morissen.

FOTOS MAD